



## MSM kembali untung walaupun kos pengeluaran meningkat

Oleh **Wartawan BH** - Februari 22, 2024 @ 8:16pm  
[bhbiz@nstp.com.my](mailto:bhbiz@nstp.com.my)



Harga runcit gula di Malaysia kini merupakan yang terendah di rantau ini -NSTP/Saifullizan Tamadi

KUALA LUMPUR: MSM Malaysia Holdings Bhd (MSM Malaysia), pengeluar gula bertapis nasional jenama 'Gula Prai' mencatatkan keuntungan sebelum cukai (PBT) sebanyak RM53 juta bagi suku keempat tahun kewangan berakhir Disember 2023, berbanding kerugian sebelum cukai (LBT) RM47 juta yang dicatatkan pada suku yang sama tahun lalu.

Ia disebabkan oleh margin lebih baik dan penggunaan kapasiti yang lebih tinggi, walaupun berdepan dengan kos pengeluaran yang lebih tinggi.

Kos pengeluaran meningkat sebanyak 17 peratus didorong oleh NY11 yang lebih tinggi (18 peratus), kos pengangkutan (18 peratus) dan tukaran wang asing (lima peratus).

Hasil bagi suku keempat tahun kewangan 2023 meningkat kepada RM950 juta, 40 peratus lebih tinggi berbanding RM678 juta bagi suku sama tahun kewangan 2022, disebabkan oleh purata harga jualan (ASP) 27 peratus lebih tinggi dan jumlah jualan 11 peratus lebih tinggi, terutamanya disumbangkan sebanyak 48 peratus peningkatan dalam segmen eksport.

Kumpulan merekodkan faktor penggunaan (UF) yang lebih tinggi sebanyak 52 peratus pada suku keempat 2023 berbanding 49 peratus pada suku sama tahun sebelumnya dan sedikit peningkatan dalam hasil kecekapan kepada 95.3 peratus pada dikaji berbanding 95.1 peratus pada suku sama tahun kewangan terdahulu.

Ketua Pegawai Eksekutif Kumpulan MSM, Syed Feizal Syed Mohammad berkata, keuntungan MSM adalah hasil daripada prestasi operasi yang lebih kukuh memacu kecekapan kos seperti yang disasarkan.

Katanya, sebagai tambahan kepada prestasi mampan MSM Prai, MSM Johor mencatatkan keuntungan bersejarah buat kali pertama pada suku keempat tahun kewangan 2023, menandakan pencapaian penting sejak pengkomersialannya pada 1 April 2019.

"Kebolehpercayaan dan proses penambahbaikan yang dipertingkatkan akan menjadi fokus MSM Johor untuk 2024 dan kami optimis untuk masa depan MSM Johor dengan prestasi yang lebih kukuh serta jualan komersial yang lebih tinggi dengan program peningkatan," katanya dalam satu kenyataan.

Bagi tempoh 12 bulan berakhir 31 Disember 2023, MSM mencatatkan LBT yang lebih rendah sebanyak RM28 juta berbanding LBT sebanyak RM179 juta dalam tempoh yang sama tahun lalu.

Hasil untuk tahun yang dikaji meningkat 20 peratus kepada RM3.09 bilion daripada RM2.57 bilion dalam tempoh yang sama tahun lalu.

Peningkatan hasil adalah disebabkan oleh ASP yang 19 peratus lebih tinggi dan jumlah jualan empat peratus lebih tinggi.

Termasuk dalam hasil adalah jualan Gula Super dan insentif industri yang diterima daripada kerajaan.

Kos pengeluaran pada tahun itu telah meningkat disebabkan oleh peningkatan NY11 sebanyak 14 peratus, kadar ringgit berbanding dolar Amerika Syarikat (AS) lima peratus lebih tinggi dan kadar gas 15 peratus lebih tinggi.

"Industri gula tempatan sedang bekerjasama dengan kerajaan untuk memuktamadkan mekanisme penetapan harga yang mampan untuk segmen runcit domestik dalam memastikan keterjaminan makanan dan kemampanan ekonomi industri gula tempatan.

"Bekalan kepada segmen borong dan runcit bagi pengguna terdiri daripada 40 peratus perniagaan MSM dan industri gula tempatan telah meminta penyelesaian segera kejanggalan di dalam harga runcit gula yang kini merupakan harga terendah di rantau ini.

"Indonesia baru-baru ini meningkatkan harga runcit kepada kira-kira RM5.80 sekilogram daripada RM4.50 sekilogram disebabkan tekanan kos input dan harga runcit Filipina pula pada purata RM8.50 sekilogram," kata Syed Feizal.

\*\*\*

HEADLINE	MSM kembali untung walaupun kos pengeluaran meningkat
MEDIA	Berita Harian- Online
DATE	22 February 2024, 8:16pm
BY	Wartawan BH
LINK	<a href="https://www.bharian.com.my/bisnes/korporat/2024/02/1215684/msm-kembali-untung-walaupun-kos-pengeluaran-meningkat">https://www.bharian.com.my/bisnes/korporat/2024/02/1215684/msm-kembali-untung-walaupun-kos-pengeluaran-meningkat</a>